



Kamis, 15 Pebruari 2024
Ogen: 1 Timotius 2:1-4



Notokən Si Terpilih



Ertoto e me tanggungjawab kalak si erkiniteken. Kerina paksa, situasi, kedan si man dahinken ras ulih si idahinken arus kepe tetap si arak-arak alu pertoton. Tanggungjawab guna notoken enda la saja terjeng dirinta, jabunta, kade-kadeta tapi pe pemerintahenta. Gelah kegeluhenta sebage rakyat banci senang ras dame, sabap si ngaturken perdalinen kegeluhen i bas Masyarakat rikut bangsa ras negaranta e me pemerintahenta.

I bas paksa perpudi enda enggo me kita iajuk guna muat bagin i bas nentuken wakilta i bas legislative bas kerina tingkatan rikut pe presidennta. Enggo silakoken sitotoken kita ndai ibas wari sinderbih ibas pemilihen umum (PEMILU). Enggo me dat gambaren si lulus, tampe jadi pemimpinta. Emaka perlu kal tetap sitotoken kerina si dat sebage presiden, wakil presiden ras anggota dewan. Alu terpilihna ia, min kegeluhen bangsa negaranta rikut rayat reh sikap dengen Sejahtera. Idahikenna tugasna sue ras kai siijanjikenna paksa ia kampanye, ula sempat ia lupa nandangi siibelaskenna.

La saja sie, tapi pe calon-calon si ikut kontestasi tapi langa tampe, sitotoken gelah ia ngasup ngaloken ulih si lit, la ia sakit, la rubat rasa nak jabuna. Sitotoken kerina si enggo muat bagin ibas pemilihen, kerina panitia rikut saksi ras pemantau, malem atena sabab bujur ia ibas ndalanken tugasna. Termasuk pe kerina tim sukses rikut relawan si enggo asa ngasupna ilakokenna dahinna gelah tetap sehat.

Bageme kegeluhen enda arus tetap siterusken, mulihi kita bergandengan tangan guna kiniulin kegeluhenta, beda partai, beda pilihan enggo lepas. Paksana mari ndalani kegeluhenta alu mehuli dengen keriahen ukur janah ibas kerina silakoken kita tetap ngataken bujur man Dibata ibas pertotonta.

➤ *Sidukung ras situmpak-tumpak pemimpinta siterpilih*